

Skupština Kantona Sarajevo

Admela Hodžić, zastupnica u Skupštini Kantona Sarajevo

Sarajevo, 23.02.2026. godine

Bosna i Hercegovina

Federacija Bosne i Hercegovine

Kanton Sarajevo

Skupština Kantona Sarajevo

N/r predsjedavajućeg

Vlada Kantona Sarajevo

N/r premijera

Ministarstvu zdravstva Kantona Sarajevo

Javna ustanova Dom zdravlja Kantona Sarajevo

Javna ustanova Zavod za hitnu medicinsku pomoć Kantona Sarajevo

Općina Trnovo

ZASTUPNIČKA INICIJATIVA

Na osnovu čl. 106. i 213. stav (1) Poslovnika Skupštine Kantona Sarajevo („Službene novine Kantona Sarajevo“, broj: 41/12-Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22 i 17/22-Ispravka i 47/24) podnosim inicijativu Vladi Kantona Sarajevo, Ministarstvu zdravstva Kantona Sarajevo, Javnoj ustanovi Dom zdravlja Kantona Sarajevo, Javnoj ustanovi Zavod za hitnu medicinsku pomoć Kantona Sarajevo, da što prije **poduzmu sve potrebne mjere i radnje kako bi se na području općine Trnovo ali i na kompletnom turističkom lokalitetu koje obuhvata planina Bjelašnica uspostavile zajedničke prostorije za ambulantu i punkt hitne pomoći sa kompletnim timovima medicinskog i drugog kadra, koji će građanima i mnogobrojnim turistima pružati medicinsku zaštitu i hitnu pomoć 24 sata dnevno na kompletnom lokalitetu, te da u saradnji s Općinom Trnovo pristupe iznalaženju rješenja najpristupačnije lokacije za prostorije za kompletno područje.**

Obrazloženje:

Javna ustanova Dom zdravlja Kantona Sarajevo predstavlja najveću zdravstvenu ustanovu u Bosni i Hercegovini koja pruža primarnu zdravstvenu zaštitu i

specijalističko-konsultativne usluge za 422.099 stanovnika. O veličini i značaju ustanove najbolje svjedoči podatak da je tokom 2025. godine ostvareno više od 15 miliona posjeta i usluga. Ustanova djeluje kroz 92 lokaliteta, organizovanih u deset organizacionih jedinica koje obuhvataju centralni objekat i pripadajuće ambulante. U njima je zaposleno preko 2.000 radnika, posvećenih pružanju kvalitetne zdravstvene zaštite stanovništvu Kantona Sarajevo. Njihova misija je da promovišu efektivne, pravedne, pristupačne, integrirane i troškovno efikasne zdravstvene programe i usluge, u skladu sa savremenim medicinskim dostignućima i mogućnostima društveno-ekonomskog konteksta. Sve usluge zasnovane su na savremenim medicinskim dostignućima, a primjenjuju se u skladu sa vlastitim kapacitetima i uslovima društveno-ekonomskog konteksta. Time osiguravaju da zdravstvena zaštita bude kvalitetna, dostupna i prilagođena potrebama zajednice. **Njihov cilj je da kontinuirano unapređuju kvalitet zdravstvene zaštite, kako bi zadovoljili potrebe građana za primarnom i specijalističko-konsultativnom zdravstvenom zaštitom.**

Sinergijskim djelovanjem primarne i specijalističko-konsultativne zdravstvene zaštite grade okruženje u kojem se njeguje izvrsnost u radu, profesionalni razvoj svih uposlenika, timski duh i ljudskost u međusobnim odnosima. Vođeni ovim principima, Dom zdravlja Kantona Sarajevo nastoji:

- Odgovoriti na sve potrebe pacijenata kroz kvalitetnu i dostupnu zdravstvenu zaštitu
- Potvrditi svoju ulogu respektabilnog partnera u zdravstvu
- Doprinositi očuvanju zdravlja stanovništva i napretku cijele zajednice

Njihova vizija je da budu prepoznati kao ustanova koja spaja stručnost, humanost i inovativnost, stvarajući sistem zdravstvene zaštite koji donosi sigurnost i povjerenje svakom građaninu.

Na tragu svega navedenog, a u cilju odgovora na zahtjeve svih naših sugrađana i naših dragih gostiju, turista iz mnogobrojnih zemalja koji nas kontinuirano posjećuju, nastojimo iznaći najbolja rješenja kada se radi o redovnoj zdravstvenoj zaštiti i hitnim medicinskim intervencijama podjednako brzo, kvalitetno, pravovremeno i adekvatno kao i do sada, sasvim je opravdano uputiti u skupštinsku proceduru ovakav jedan zahtjev, odnosno inicijativu.

Imajuću u vidu nemile događaje gdje su se naši sugrađani našli u nezavidnoj situaciji na našoj turističkoj ljepotici Bjelašnici kada je umjesto ljekara Hitne pomoći Kantona Sarajevo, radnik JKP odlučivao, zbog propisanih procedura, kada će i hoće li pustiti hitnu u kojoj je bila djevojčica koja je imala gušenje i koja se borila za život svakim novim dahom. Iako je radnik JKP postupao po propisanim procedurama, iako je sve trajalo nekoliko minuta, ovaj događaj i ova vijest nam nikako ne idu u prilog dobrog i brižnog domaćina. Ostavljamo utisak, da na turističkoj destinaciji kakva je Bjelašnica, izvan skijališta nemamo adekvatnu medicinsku pomoć i zaštitu bilo ko da se povrijedi, a znamo da su mještani Trnova, kao najbolji domaćini, dali sve od sebe da imaju cjelogodišnju turističku ponudu u raznim turističkim programima. Upravo zbog ovako gostoprimljivih domaćina vraćaju nam se turisti svake godine iz regiona, Njemačke, Švedske, Kine, Saudijske Arabije, SAD-a i mnogih drugih zemalja.

Zbog svega navedenog, sigurna sam da nam ovakvi nemili događaji ne idu u prilog, pogotovo što je sa jedne turističke destinacije poslana ovakva slika u javnost, i zbog naših sugrađana, a i zbog naših dragih gostiju koji nam se uvijek rado vraćaju.

Sasvim je sigurno da se mnogi pitaju imamo li adekvatnu i pouzdanu zdravstvenu zaštitu i hitnu medicinsku pomoć na ovom veoma važnom turističkom lokalitetu.

Naši medicinari vrijede za najstručniji i najprofesionalniji kadar u Kantonu Sarajevo, BiH i šire, sigurna sam da će se u skorije vrijeme iznaći najbolje rješenje kada je medicinski kadar u pitanju, a isto tako i Općina Trnovo vrijedi za dobrog i gostoljubivog domaćina i da će dati sve od sebe da obezbijede najbolji i najpristupačniji lokalitet, i za stanovnike općine Trnovo i za turiste, kada je u pitanju iznalaženje rješenja za najbolju lokaciju za ovu namjenu. Dobro bi bilo da Općina Trnovo ujedno planira i ekipu GSS-a na istoj lokaciji, kako bi na jednom mjestu imali spašavanje, zdravstvenu zaštitu i hitnu pomoć stanovništvu i turistima u okviru jednog savremenog centra na Bjelašnici.

Prije samog pokretanja ove inicijative obavila sam razgovor sa direktoricom Hitne pomoći Kantona Sarajevo, dr. Jasnom Huseinbegović-Musić i direktorom Doma zdravlja Kantona Sarajevo, dr. Elvedinom Tatarevićem, koji su odmah izrazili podršku u realizaciji ovog projekta, uz obećanje da će učiniti sve da u potpunosti kapacitiraju kadrom i opremom ovakav jedan centar na Bjelašnici, uz što je potrebna finasijska i druge vrste pomoći Skupštine i Vlade Kantona Sarajevo i Općine Trnovo.

Podaci sa stranice Općine Trnovo

Teritorija Općine Trnovo zauzima površinu od 337 km² sa oko 3.000 stanovnika nalazi se na nadmorskoj visini između 650 i 2080 metara, dok je prosječna visina je 900 metara. Trnovo je locirano na planinskim obroncima Bjelašnice, Igmana, Visočice, Treskavice i Jahorine.

Vodeća je turistička destinacija sportsko-rekreativnog i ruralnog turizma u BiH, prepoznatljiva po ponudi organskih proizvoda, ugodnom i zaštićenom ambijentu za život. Trnovo je popularno turističko odredište zahvaljujući jedinstvenom planinskom kompleksu Igmana i Bjelašnice, koji nude cjelogodišnje sadržaje. Područje privlači posjetitelje nedirnutom prirodom, planinama Treskavica i Visočica, kanjonom Rakitnice te bogatom ponudom za zimske sportove.

- **Glavna odredišta:** Igman, Bjelašnica, Treskavica, kanjon Rakitnice i doline rijeka (Željeznica, Crna rijeka).
- **Aktivnosti:** Zimski sportovi, planinarenje, pješaćenje i uživanje u prirodi.
- **Razvoj:** Općina Trnovo radi na razvoju seoskog turizma, uključujući izgradnju eko-etno sela i očuvanje kulturno-historijskog naslijeđa.

Infrastruktura: Grade se moderne saobraćajnice koje povezuju naseljena mjesta, a postojeći kapaciteti se temelje na tradiciji Olimpijskih igara iz 1984.godine.

Raste broj turista u Kantonu Sarajevo, koji najčešće posjećuju Bjelašnicu, ali i druga turistički poznata mjesta, popularna izletišta i prirodne ljepote općine Trnovo.

Olimpijski centar Bjelašnica – Igman udaljen je od Sarajeva samo 25 kilometara. U toku godine ima više od 200 snježnih dana, idealno za skijanje i bordanje za dnevne aktivnosti, a određeni dio staza je osvijetljen takmičarskom rasvjetom za sve ljubitelje noćnog skijanja.

Centar obuhvata tri odredišta za skijanje: Babin Do na Bjelašnici, čije se staze nalaze u samom vrhu evropskih ski staza, te Veliko i Malo Polje na Igmanu. Skijalište Babin Do posjeduje osam ski i pet dječijih staza, tri žičare i pet ski liftova, koji vode i do samog vrha Bjelašnice na 2 067 m. Skijašima ova planinska ljepotica pruža 14 000 m staza za alpsko

skijanje, dok je 2 000 m ukupna dužina staza na Igmanu. Zbog položaja u središtu borove šume, smatra se da je kvalitet zraka na Velikom Polju jedan od najboljih u Europi.

Iako je za sezonu ljetnih godišnjih odmora karakterističan odlazak na morsku obalu, veliki broj je i onih koji upravo u ljetnom periodu posjećuju planine. Bjelašnica nudi niz zanimljivih sadržaja; paraglajding, vožnja biciklom, kvadovima, samo su neke aktivnosti koje su stavljene na raspolaganje posjetiocima na ovoj olimpijskoj ljepotici, no svakako najveća atrakcija i interes kako domaćih tako i stranih gostiju je panoramsko razgledanje platoa Bjelašnice.

Iz Turističke zajednice KS navode da je najviše dolazaka stranih turista bilo iz: UAE, Saudijske Arabije, Bahreina, Kuvajta, Njemačke, Turske, Srbije, Hrvatske, SAD-a i Katara.

Pored zimskih sportova i rekreacije za odrasle, bogata je ponuda i dječijeg rekreativnog i zabavnog programa, dok se ljeti posjetiocima Bjelašnice, između ostalog, nudi: uspon od Babinog dola do vrha opservatorija, posjeta životopisnom selu Umoljani i Studenom potoku, lakša tura planinarenja od Umoljana do sela Lukomir, odmor na izletištu Javorov do, kao i mnoge staze za brdski biciklizam i motociklizam sve u cilju bogate cjelogodišnje turističke ponude.

Zbog svega navedenog smatram da ovakva jedna turistička destinacija zaslužuje samo najbolje, kada se radi o zdravstvenoj zaštiti, hitnim medicinskim intervencijama i spašavanju stanovništva i turista, izgradnjom jednog savremenog multifunkcionalnog centra na najpristupačnijoj lokaciji za kompletno područje Trnova i Bejlašnice, te molim nadležne da što prije razmotre ovu inicijativu i pokrenu aktivnosti za realizaciju.

Sarajevo, 23.02.2026. godine

Admela Hodžić